



SAMBAND ÍSLENSKRA SVEITARFÉLAGA

Alþingi
b.t. velferðarnefndar
Austurstræti 8-10
150 Reykjavík

Reykjavík 17. febrúar 2020

2002025SA TP
Málalykill: 00.63

Efni: Breytingar á lögum um heilbrigðisþjónustu - 439. mál 150. lþ.

Vísað er til tölvupósts frá nefndasviði Alþingis, dags. 9. desember sl., þar sem frumvarp um ofangreint efni (þjónustustig, fagråd o.fl.) var sent til umsagnar hjá Sambandi íslenskra sveitarfélaga. Vegna anna hefur dregist að ljúka umsögninni og er beðist velvirðingar á því.

Eins og fram kemur í greinargerð voru drög að frumvarpinu kynnt í samráðsgátt stjórnvalda. Sambandið sendi inn ítarlega umsögn um drögin þar sem m.a. er rökstutt að stigskipting heilbrigðisþjónustu snerti hagsmuni sveitarfélaga og íbúa þeirra með beinum hætti, einkum hvað varðar fyrirkomulag öldrunarmála. Óhjákvæmilegt sé, þegar stigskipting er ákvörðuð, að horfa til þess hvernig móta eigi verkaskiptingu í öldrunarþjónustu og afstaða tekin til þess hvaða heilbrigðisþjónusta sé veitt inni á heimilum fólks.

Þessara röksemda og sjónarmiða sambandsins er í engu getið í greinargerð með frumvarpinu. Af þeirri ástæðu leggur sambandið umrædda umsögn fram að nýju, sbr. meðfylgjandi.

Jafnframt leggur sambandið áherslu á sjónarmið sveitarfélaga um þróun öldrunarþjónustu til framtíðar, sbr. umræðuskjal sem tekið var saman í tengslum við landsþing sambandsins 2018. Í stefnumörkun 2018-2022, sem unnin var á landsþinginu, er mikil áhersla lögð á heilbrigðisþjónustu sbr. meðfylgjandi útdrátt. Er ljóst að markmið sem sveitarfélög stefna að snerta með ýmsum hætti stigskipta heilbrigðisþjónustu m.a. í gegnum eftirfarandi álitæfni:

- Greiðsluþátttaka þeirra sem dvelja í hjúkrunar- og dvalarrýmum.
- Hjúkrunar- og dvalarrými - heimili eða stofnun?
- Notendasamningar um öldrunarþjónustu.
- Dagdvöl - heilbrigðisstofnun eða félagslegt úrræði?
- Málefni yngri hjúkrunarsjúklinga.

Tekið skal fram að fulltrúar sambandsins átti ágætan fund með heilbrigðisráðherra þann 6. febrúar sl. Niðurstaða fundar var að setja niður sameiginlegan hóp með fulltrúum heilbrigðisráðuneytisins og sambandsins til þess að kortleggja þjónustu og taka saman gögn og aðrar upplýsingar sem nauðsynlegar eru við ákvarðanatöku um fyrirkomulag þjónustu við aldraða. Sambandið bindur miklar vonir við að sú vinna skili sér inn í aðgerðaáætlanir sem unnið er að í ráðuneytinu á grundvelli samþykkrar heilbrigðisstefnu til 2030.


Þá kemur félagsmálaráðuneytið einnig að mótun stefnu um öldrunarþjónustu, m.a. í gegnum vinnu starfshóps sem ætlað er að fjalla um málefni aldraðra á breiðum grundvelli. Jafnframt er að störfum einn hópur til viðbótar sem ætlað er að fara yfir heilsueflingu eldri borgara með það fyrir augum að auka lífsgæði þess hóps og seinka því að hann þurfi viðameiri þjónustu í hjúkrunar- eða dvalarrýmum. Sveitarfélögin hafa tekið virkan þátt í verkefnum sem að þessu líta og telja mikil sóknarfæri í þessu efni, en leggja líka áherslu á að hagrænn ávinningur af forvörnum, heilsueflingu og endurhæfingu skili sér til þeirra.

Hvað þetta varðar reynir á að fjárhagslegir hvatar séu mótaðir af skynsemi og gráum svæðum fækkað eins og kostur er. Sambandið hefur jafnan lagt megináherslu á að við setningu og endurskoðun laga um velferðarþjónustu séu öll tækifæri nýtt til þess að skerpa á ábyrgðar- og verkaskiptingu þeirra mörgu aðila sem saman mynda velferðarkerfið.

Sambandið telur að velferðarnefnd Alþingis gegni þar ákveðnu samhæfingarhlutverki og fer þess sérstaklega á leit að mega fylgja eftir ofangreindum sjónarmiðum á fundi með nefndinni.

Virðingarfyllst

SAMBAND ÍSLENSKRA SVEITARFÉLAGA



Karl Björnsson
framkvæmdastjóri